



ル 5
3185
2





異域攢談西陲軍事卷二

準噶爾滅亡紀略



準噶爾額魯特部落也不種五穀以遊牧  
為業以肉為食以牛馬乳為酒有姓氏族  
系同姓亦不為婚而男女無別甚於回人  
稱其王曰汗次曰台吉曰宰桑風俗尅頑  
無耻以竊劫為能不作賊者不齒於人數  
一人而能劫數人者謂之健男子習尚然

昭和十五年  
三月二十一日  
藏本



也然亦不盜其種人之所有尤敬喇嘛惟  
其言是尊遙望見之輒免冠叩首喇嘛手  
摩其頂即喜悅忭舞生女擇其美者進之  
喇嘛少婦遇有疾病輒求與喇嘛歇宿經  
年累月而本夫欣慰焉女子在家生育謂  
之有福求聘者踵相接不然無人問名無  
正朔喇嘛人等以萬年書按筭分至啟閉  
亦不甚懸遠差謬人死則棄之移其毡帳  
而去或置之山林曠野中與野獸殘食謂  
亡者無罪早得人化其歌音淒慘野靜羣  
謳遙聽之令人酸鼻實屬夷則之音地踞  
伊犁烏魯木齊雅爾著勒土斯瑪納斯巴  
彥帶之間幅幘寬廣草肥水甘牲畜易於  
蕃息人強悍善游牧習於勞苦好鬪喜殺  
慣用烏鎗木矛回回各城及哈薩克皆其  
阿拉巴圖阿拉巴圖者屬人也控弦近百



萬人馬駝牛羊遍滿山谷以故恃其強盛  
侵凌鄂羅斯溫都斯坦鄂罕各國四出劫  
掠康熙雍正年間時為中國邊寇至雍正  
時寇犯西藏哈密尤急用兵數年雖有殲  
戮亦未經勦滅伏誅策旺阿拉布坦死無  
子其弟噶爾旦策冷坐床坐床者即位也  
噶爾旦策冷生三子一女長子曰喇嘛達  
拉扎次曰阿劉次曰莫可什女曰烏蘭巴  
雅爾阿劉母貴喇嘛達拉扎婢所出也噶  
爾旦策冷死國人立阿劉坐床阿劉殺莫  
可什喇嘛達拉扎弑阿劉而自立烏蘭巴  
雅爾同其夫與喇嘛達拉扎為敵喇嘛達  
拉扎殺之當是時達瓦齊阿睦爾薩納另  
居雅爾地方各有阿拉巴圖數千戶達瓦  
齊族貴無甚伎倆阿睦爾薩納出身微賤  
而狡滑克狠迥異諸酋亦各皆不平喇嘛



達拉扎之所為與之抗拒兵敗達瓦齊阿  
睦爾薩納均竄入哈薩克地方寄迹延喘  
喇嘛達拉扎與其喇嘛台吉密議以二人  
不死終為隱患遂使其心腹人等帶領精  
兵六萬人極力西追搜查哈薩克各受曼  
務在窮其踪跡期必殲滅達瓦齊計無所  
出日夜流涕而阿睦爾薩納聞風即揀其  
精銳一千五百人裹乾肉為糧於草灘山  
徑無人之地晝伏夜行而東闖入伊犁襲  
殺喇嘛達拉扎於毡帳阿睦爾薩納賤國  
人不服於是立達瓦齊坐床而事起矣初  
噶爾旦策冷之父利前後兩藏之富饒也  
欲令拉藏王叛中國而歸入準夷約為婚  
姻以其親女贅拉藏王之子為婿誘至伊  
犁而後索兩藏之地拉藏王問之達賴喇  
嘛不從噶爾旦策冷之父遂由回地之沙



雅爾城寇犯前藏噶爾虎爾為之鄉導郭  
璧大近星宿海皆知沮額魯特之人馬牲  
畜殘傷十之六七未能得志怒遂將其婿  
拉藏王之子殺害時其女有孕羣議生男  
則殺之生女則留之及產果女子也長適  
於人而生阿睦爾薩納阿睦爾薩納生遍  
體皆血或謂此仇讐之再來也且此女嫁  
後噶爾旦策冷亦欲併其婿殺之巡至雅  
爾地方此女之婿慮及於難竭力趨奉且  
裝飾極美之女子一人進侍枕席噶爾旦  
策冷納之即喇嘛達拉扎之母也達瓦齊  
立不能統馭所屬其下歲叛亂必阿睦爾  
薩納來為之紀理阿睦爾薩納教誚讓之  
達瓦齊遂以隱恨成隙其後達瓦齊漸與  
國人和睦則以其阿睦爾薩納賊恨起兵  
欲殺之阿睦爾薩納牲畜缺乏人戶微弱



不能抗拒遂率其部落於乾隆十九年款  
關投誠

上受降封阿睦爾薩納為親王

命兩廣總督班第為定遠將軍兩江總督鄂容  
安為叅贊大臣部署滿漢索倫察哈爾官  
兵出嘉峪關以阿睦爾薩納為副將嚮導  
由巴里坤烏魯木齊直擣伊犁軍威赫盛  
旗幟被野準噶爾各受曼之喇嘛宰桑人  
等率其人戶望塵叩降角崩恐後達瓦齊  
見人心離散不能與大兵抵觸計無所出  
隱念烏什回城之阿奇木伯克霍幾斯係  
伊所自立有恩可以倚庇遂率其子羅布  
藏並親丁百口由穆肅爾打版逃入回城  
去烏什四十里屯劉遣人告知霍幾斯而  
霍幾斯已遣人載酒牽羊來迎達瓦齊之  
黨以為不可測也此去烏什四十里霍幾



斯早知我等來奔僅餽羊酒不親身來必  
有他圖速他往不可入其城村而達瓦齊  
終以渠遇霍幾斯厚霍幾斯弟兄四人皆  
阿奇木伯克皆達瓦齊所立必不至於背  
恩遂烹羊酌酒徒衆俱醉霍幾斯伏兵起  
而縛之達瓦齊之子羅布藏猶刃傷一人  
達瓦齊父子就擒霍幾斯遂迎接大兵呈  
獻霍幾斯受王封準噶爾部落悉平

椿園氏曰開國成家盛衰存亡之數夫惟  
人心為主夫以準噶爾之強也其人頑健  
而殷繁其地險遠而龐雜上下緝睦勢總  
力一以故恃其強梁四出為害而及其敗  
天兵西下勢如拉朽以百萬之衆萬里之地  
不二年間誅戮幾無遺子豈獨  
天獸其種類哉篡殺相尋人心襍馳勢散而  
不能合一之故也夫周以忠厚立國及其



衰也雖七雄並起而猶目天王漢以廉讓  
成風迨其季也雖庸愚負販而均思漢臘  
有風借然後有人心所以固結之者深且  
遠也唐元有明一敗塗地無怪其然以便  
佞巧令為長村以奴顏婢膝為圓合風俗  
卑污廉耻道喪人心亦因之而不可問矣  
然而說也不啻為愚則笑為迂尚何責於  
準夷之蠢類哉

阿睦爾薩納額魯特叛亡紀略

阿睦爾薩納性狡詐反復不常渠既與達  
瓦齊不和率其部落款闕來降復導引大  
兵平定伊犁達瓦齊就擒意欲伏

皇上天威立伊為準噶爾汗統轄各部落可以  
任彼施為蓄心且不測矣而

皇上廟筭別有深謀阿睦爾薩納覺其光景不  
能如願遂背



思謀逆煽惑額魯特諸愛曼並其親近人戶  
弄兵叛亂時大兵俱已凱還惟將軍叅贊  
駐劄丕爾沁地方辦理善後事宜滿漢官  
兵僅五百人事起倉卒遂被其害將軍班  
第叅贊鄂容安死之是時阿睦爾薩納之  
妻另居他所亦糾合人衆約日同叛辦理  
糧餉大臣舒赫德設計擒之解送京師阿  
睦爾薩納雖叛額魯特各愛曼人心不同  
各爭雄長互相殘殺均不聽阿睦爾薩納  
指揮而大兵由烏魯木齊雲集電進額魯  
特人等抗拒者盡行誅戮迎降者予以安  
插勁兵分道追勦阿睦爾薩納兵盡勢窮  
與其親丁七人共八騎逃入鄂羅斯地方  
遂死大兵追至鄂羅斯其察汗漢遣人獻  
阿睦爾薩納之尸焉額魯特人等復歸化  
諸軍撤退留將軍兆惠帶兵六千駐劄其



地鎮撫之而經理之事未脩額魯特又復  
叛亂糧道斷絕將軍兆惠帶兵且戰且退  
賊氣蜂擁前後邀遮日日戰鬪逾三月而  
後至巴里坤

上震怒以額魯特種人反覆難訓

命二將軍各將數萬人合門並進自嘉峪關  
以至伊犁大兵分途進剿誅殺額魯特男  
婦子女逾百萬人喇嘛台吉數萬其餘逃  
竄伏於山谷中者曰麻哈沁官兵四出搜  
查誅夷盡絕因而滅其種類今所存之額  
魯特多當時逃遁之遺孽也於是準噶爾  
故地盡入版圖設駐防官兵以鎮守之  
布拉敦霍集占叛亡紀略  
和卓木墨特回回之舊家也回地數城皆  
準噶爾之阿拉巴圖歲納米布皮張以為  
賦稅準噶爾汗以和卓木墨特族貴衆所



尊服使之總理回地各城自其祖父以來  
居住葉爾羌為準噶爾辦理回城事務至  
和卓木墨特性狡詐多權術善收人心喀  
什噶爾葉爾羌之強悍回子皆其心腹黨  
羽遇事多所牴牾漸欲背準噶爾而自立  
事業準噶爾汗噶爾旦策冷怒擒赴伊犁  
置地牢中數年後始放出牢仍於伊犁禁  
錮之和卓木墨特在伊犁生二子長曰布  
拉敦亦曰布拉伊敦次曰霍集占即回人  
所稱大小和卓木也和卓木墨特死二子  
仍在伊犁準噶爾慮其生事不肯放回乾  
隆二十年平定伊犁將軍班第始將布拉  
敦霍集占弟兄二人釋放使歸葉爾羌故  
地招集回人同沾  
王化布拉敦霍集占既至葉爾羌其祖父之  
心腹黨羽及耆舊親族雲集響應椎牛宴



會共相勞苦衆議所向布拉敦欲安集回地各城聽候

大皇帝諭旨而霍集占不從以你我弟兄二人被準噶爾禁錮有年今始得歸故土若聽

大皇帝諭旨你我二人中必有一人喚至北京以為質當與禁錮何異莫若與中國抗拒地方險遠中國兵不能一時即來來亦率皆疲憊糧運難繼應亦無奈我何且準噶

爾已滅近地並無強隣收羅城池可以自立衆以為然於是其伯克人等傳示各愛曼整備鞍馬器械推任大小和卓木指麾葉爾羌喀什噶爾和闐之衆數十餘萬戶皆從之起事初布拉敦霍集占自伊犁放歸時素與有隙之庫車阿奇木伯克鄂對伊子鄂斯滿與拜城人噶達墨特伊子阿布都爾滿與色提巴爾第伊弟阿克伯克



等聞風知其必加殘害棄家而逃往伊犁  
迎接大兵投城歸化布拉敦霍集占既叛  
自葉爾羌東至庫車所有烏什阿克素拜  
賽哩木各城均為其挾制煽惑從之播亂  
而霍集占尤狡狼諸事皆聽其意指渠以  
庫車地方為西入回地之要路以其心腹  
人阿布都克里木為偽阿奇木伯克送撥  
精兵一千與庫車民同守禦當是時將軍  
兆惠有事於伊犁微有風息不能得其確  
信因差領隊大臣伊敏圖滿兵百人回人  
鄂對噶達墨特等百人頗魯特兵二千由  
著勒土斯山徑前赴庫車責徵糧石体察  
情形至庫車之伯幾爾山見殺死三人鄂  
對俱識認即回明領隊大臣言此山中殺  
死三人係鄂對親屬今既被殺則庫車之  
聽從霍集占叛亂明確我等雖有滿兵百



人人少力不足額魯特兵二千不能得用  
不必前往大臣不從至庫車城其阿奇木  
伯克阿布都克里木邀請兵衆入城鄂對  
噶達墨特及額魯特兵二千均知其詐不  
肯聽從回犂伊而去領隊大臣伊敏圖帶  
滿兵百人入城咸被其害乾隆二十三年  
上命將軍雅爾哈善帶滿漢官兵萬餘回人鄂  
對噶達墨特色提巴爾第鄂斯滿阿克伯

克及回兵人等由土爾番進兵問罪攻取  
庫車城池月餘未下布拉敦霍集占在葉  
爾羌聞知即選其精兵萬餘人最準之贊  
巴喇烏鎗八千杆由阿克蘇之郭壁捷路  
而來於庫車城南與我兵打仗一日霍集  
占大敗戮其精銳六千人其餘入城竭力  
死守庫車城東南依就山岡城墻以柳條  
土沙築實砲攻不入時綠營官兵呈獻開



挖地道之計將軍納之由北門一里外山  
岡下開起已近城堙為一割草夜出城之  
人望見地道中氣眼透漏燈光消息泄露  
霍集占於城內反行挖出用水浸灌兵六  
百千把數員俱沒於地道中相持既久城  
內缺糧霍集占弟兄力窮不能守禦有一  
索倫兵於日夕聞城內駝鳴似馱物遠行  
之聲疑霍集占等欲行潛逃回明將軍先  
是鄂對噶達墨特色提巴爾第等回明將  
軍以回地情形我等皆所深悉目今攻圍  
既久城內必不能支霍集占不能存駐必  
向葉爾羌去去有徑路兩條一由城西南  
之渭干受曼走此地渭干河水淺人馬可  
渡渡河即向阿克蘇去之捷路矣一由河  
色郭壁爾走阿克蘇大路必從北山口要  
路而過若於渭干受曼及北山口各撥精



兵二千嚴加防守布拉敦霍集占弟兄皆不能逸脫等語將軍不從至是將軍雅爾哈善以北山口要路有兵三百屯劄且以霍集占弟兄必不肯棄城又不以回人之言為然縱酒輕敵踈於防閑時大兵均於城東布拉敦霍集占夜開西門帶其葉爾羌人馬向北山潛逃大兵竟未知覺過北山殺屯兵三百向阿克蘇而去阿克蘇人不遵霍集占約束欲與之打仗霍集占弟兄潛逃烏什烏什城門不開遂向葉爾羌而去布拉敦霍集占既逃次日庫車回民阿拉雅爾等開城投降將軍雅爾哈善引兵入城收霍集占守兵一千安插回民留鄂對之子鄂斯滿辦理庫車阿奇木伯克事初霍集占入庫車城以鄂對之不從已也凡其親屬之未逃者盡行殺死鄂對之



妻熱依木亦為其所得霍集占欲收納之  
熱依木不從因將鄂對之二女一子擲於  
城下撲殺囚熱依木於城西高樓熱依木  
越城潛逃匿於阿克蘇城以故庫車既降  
鄂斯滿手刃其仇三十餘人也

上聞震怒繫收將軍雅爾哈善入京正法

命將軍兆惠副將軍富德自伊犁進兵追勦  
軍行甚速將軍已抵阿克蘇安兵未到馬

匹之健壮者二千餘匹人皆滿洲索倫勁  
旅將軍兆惠領之先進副將軍富德催齊  
兵馬後繼而往追至葉爾羌霍集占人衆  
數萬拒敵我兵人少馬乏不能取勝遂被  
圍於葉爾羌南山下副將軍富德領兵後  
至去葉爾羌四站亦被圍兩軍阻隔不能  
通一信息台卡斷絕三十餘日然猶賴回  
兵之勇我兵未能盡沒得以保全適戶部



尚書果毅公阿里衮奉

命從軍帶兵三百人途遇解送軍營之馬七百匹均行攜帶之被圍之所使送馬兵丁逐馬於沙塵厚集之所馳驅往來烟埃大起阿里衮帶兵三百直冲賊營聲言

大皇帝發兵三十萬即刻到齊敵人望塵大惧解圍潰散副將軍富德出圍時綠營官兵陸續漸集共振兵勢直趨葉爾羌南山施

放鎗砲力功攻敵營將軍兆惠望見塵起遠聞鎗砲之聲知我兵接應遂令被圍之兵短刀步戰與外兵相應兩勢既合潰圍而出霍集占兵敗入葉爾羌城諸軍會合復回阿克蘇屯劄時台卡既斷

上知我兵被困派滿漢索倫察哈爾官兵迅速進勦星馳而來俱集於阿克蘇城將軍兆惠副將軍富德尚書阿里衮野黑德等



留色提巴爾第辦阿克蘇阿奇木伯克事  
帶領官兵進擊至喀什噶爾其地回民以  
城降留噶達墨特辦喀什噶爾阿奇木伯  
克事起兵迅進而布拉敦霍集占聞知大  
兵勢盛喀什噶爾已降料葉爾羌不能拒  
守携其党羽数千向和闐而去將軍至葉  
爾羌回衆降留鄂對辦葉爾羌阿奇木伯  
克事大兵追至和闐霍集占尚行抗拒其

最猛狼之庫車阿奇木伯克阿布都克里  
木為一索倫射死霍集占大敗而逃和闐  
降當是時布拉敦霍集占勢窮回地無容  
身之所棄和闐而竄入巴達克山欲由巴  
達克山入溫都斯坦可以免禍而巴達克  
山回王蘇爾探沙以霍集占兄弟反覆背  
叛之人若由巴達克山逃去我等取罪不  
便於是起兵阻截大戰布拉敦霍集占均



為蘇爾探沙所殺迎接大兵以尸獻餘党  
皆平擒獲者不計其數霍集占無子布拉  
敦生二子長曰薩木薩克猶與其党千人  
逃入退木爾沙而去不知所終將軍兆惠  
帶兵復回葉爾羌設防官兵定擬伯克畫  
疆界額賦貢辦善後事宜

上嘉悅封將軍兆惠為一等公世襲副將軍富  
德為一等侯世襲餘皆封蔭有差封回人

鄂對為貝勒授職葉爾羌阿奇木伯克封  
噶達墨特為一等輔國公授職喀什噶爾  
阿奇木伯克封色提巴爾第為一等輔國  
公授職阿克蘇阿奇木伯克封鄂斯滿為  
二等台吉授職庫車阿奇木伯克其餘回  
衆封賞頂戴有差巴達克山回回親王及  
其頭目人等封賞尤隆當霍集占之亂也  
布魯特比阿啟穆帶其十九愛曼人戶攔



阻霍集占與之打仗至是授職散秩大臣  
以土地賞其部落

烏什叛亂紀畧

烏什阿奇木伯克阿布都拉哈密人也隨  
從之人皆哈密人也夫哈密回戶均係伊  
薩克之阿拉巴圖呼喚使令任其意之所  
為而不敢較回疆各城則不然其伯克皆  
係流官所屬回戶等諸部民迥與哈密之

主僕名分不同阿布都拉習見哈密人為  
伊薩克服役之處視同一例加以性情殘  
暴鞭打凌辱日以為常且貧橫之極事無  
大小皆勒索多方其哈密隨來之人尤為  
不法四出詐騙烏什回民不堪其虐時辦  
事大臣蘇成糊塗淫暴而其子更惡劣凡  
遇回婦少有姿色或漢人婦女不問何人  
騙至署內父子宣淫賞給家人兵丁輪奸



以為笑樂烏什之人久欲寢其皮而食其  
肉矣時有小差役不過沿途遞送物件而  
已奉差之人未知送至何所向阿奇木伯  
克請示阿布都拉怒不明告之反以為唐  
突重責數十鞭差人無柰向印房章京請  
示又不明告之以為越釐各責三十大板  
以致群回含冤兼以夙憤遂謀作亂然亦  
僅三百餘人耳且事迹顯露為一回子所

知將伊等如何起意叛亂如何動手現今  
聚集何處之底裡奔赴阿奇木伯克家觀  
面告之而阿布都拉飲酒正酣以為阻興  
將其人斥逐而去益縱飲大醉昏不知人  
其夜三鼓回衆亂起先將阿布都拉閣家  
殺死然後入蘇成署內將伊父子及家奴  
兵丁亦皆殺死盡皆錯骨分尸蘇成父子  
之妻妾少女及其兵僕之妻女皆輪奸淫



死緊閉城門內地之官兵貿易人等皆被  
其害無一脫者時最近之阿克蘇辦事大  
臣邊他哈知烏什亂即帶兵數百人趕赴  
烏什而烏什回民開城迎接邊他哈隨向  
之施間一砲城門復閉是時城中作亂之  
人不過數百其餘皆閉戶不干預其事至  
此則羣起叛亂共推阿拉木圖喇為阿奇  
木伯克擁衆開城拒戰邊他哈大敗而逃

庫車辦事大臣鄂寶帶領回漢兵前往亦  
敗回阿克蘇屯劄南路總理回疆之叅贊  
大臣那世通自喀什噶爾帶兵而來伊犁  
將軍明瑞叅贊大臣永貴帶領滿漢官兵  
一萬餘人由穆肅爾打版來諸軍盡赴烏  
什圍其城

上震怒邊他哈以失機正法那世通以他事誅  
諭旨嚴切諸軍攻取不遺餘力賊亦拒城死守



初烏什之亂葉爾羌貝勒鄂對之妻熱依  
木隨其子鄂斯滿住居庫車聞風即告知  
庫車大臣以回性好效旁人所為烏什既  
反葉爾羌人戶尤衆且伯克阿洪中多刁  
野強梁之人難保無滋事處伊夫鄂對性  
懦無斷恐為衆所愚我等一家皆死我今  
前往葉爾羌一同鄂對料理等語從之熱  
依木五日夜馳三千里來至葉爾羌至則

人情汹汹動搖可危鄂對果束手無策日  
夜愁哭兩目盡腫伯克阿洪等紛紛來告  
烏什之亂熱依木含糊應之約以次日飲  
酒議事衆等歡忭而來酒半熱依木忽大  
怒曰爾等皆無賴人也受

大皇帝深恩得有今日今烏什逆亂爾等皆欲  
從之謀為不軌吾力尚能誅殺爾等今日  
莫想出我之門矣衆皆出於不意大驚且



各門均有兵馬不能逃脫倉卒不知所為  
大懼跪而求曰我等實無反心惟求阿葛  
挿保全熟依木曰爾言不反誰則信之今  
為爾計湏將各家所畜器械交出則顯無  
反心之實矣衆曰諾於是熟依木將利害  
之處詳明開導温言慰藉許以不死衆皆  
大喜整酒懽飲熟依木復令歌舞婦女將  
衆人灌之大醉一面使其心腹人將各家

器械查出交辦事大臣收貯軍庫將各家  
馬匹城外牧放者驅之數百里外深山牧  
養次日衆等皆醒無可奈何惟聽鄂對調  
遣其地乃寧貼無事烏什之城南依山岡  
北臨大河自河至城半里皆林木森森密  
布其間隔河望城不見砲攻皆落於林中  
於城無損敵兵時出戰鬪互相殺傷我兵  
不能深入深林自四月至七月未能勦除



敵人忽自將圍城樹木連夜盡行砍伐城  
池豁亮我兵直進圍之及樵路絕城內亂  
阿拉布圖喇自投遂拔其城

上知其亂之由為蘇成等所悞將首逆分別正  
法移總理回疆之叅贊大臣駐劄其地以  
鎮撫焉

土爾扈特投誠紀畧

土爾扈特蒙古人也其汗烏巴錫之遠祖

鄂岳竒率其部落投入鄂羅斯國牲畜少  
人戶微弱鄂羅斯汗與之額濟爾地方令  
其游牧其地中隔大河一道寬一二十里  
水流浩瀚兩岸地廣草肥土爾扈特人等  
分布散處得以安居樂業牧放牲畜逐水  
草圍獵之利無外侮不經戰陣其汗及台  
吉人等仍領食鄂羅斯俸薪自鄂岳竒傳  
至烏巴錫凡七世住居額濟爾河凡一百



七十餘年以故休養生息而牛駝羊不可  
勝計人戶隨從烏巴錫居於額濟爾河南  
岸者四十六萬餘戶北岸鄂克其台吉等  
管下人戶數亦相當乾隆二十年間大兵  
掃蕩準敵自伊犁等處零星逃散之部爾  
伯特懷特霍碩特及舍楞所領之額魯特  
人等均入鄂羅斯國其察漢汗均于額濟  
爾安插歸入烏巴錫統領是為新土爾扈  
特鄂羅斯北隣控噶爾原係上國鄂羅斯  
歲納貢幣乾隆三十年後鄂羅斯之察漢  
汗七年缺其貢獻又發兵侵擾而控噶爾  
地大人衆士卒多精良鄂羅斯難與為敵  
屢次敗北覆軍殺將鄂羅斯大懼而求和  
控噶爾不允責令歲納童男女各五百人  
而後罷兵由是鄂羅斯之察漢汗復起兵  
抗禦而揀土爾扈特人衆當其前鋒仍大



敗二次損傷土爾扈特人衆數萬歸來者  
十之一二乾隆三十五年鄂羅斯之察漢  
汗又復起傾國之兵赴敵令烏巴錫遜其  
精壯之士爾扈特兵六七萬前往助力欲  
與控噶爾背城一戰而土爾扈特各愛曼  
人人畏懼烏巴錫遂與額濟爾河南岸鄂  
托克之台吉喇嘛等密議欲領其部落遠  
遁偷安而躊躇未定遂以所部之軍械不

全因循推托而鄂羅斯之察漢汗即差工  
匠千人來為之修理什物烏巴錫無可諉  
卸計無所出其額魯特都爾伯特懷特霍  
碩特四種人投入額濟爾居住者原在伊  
犁之雅爾及哈拉沙拉等處遊牧其山川  
徑路皆所熟悉額魯特舍楞尤狡詐因伊  
犁之土肥水甘可以占踞遊牧唆令烏巴  
錫携其部落潛逃烏巴錫為其所惑遂與



台吉喇嘛等密議定局其額濟爾河北岸  
之衆亦約於河水水後渡河一同前赴伊  
犁共立事業於是烏巴錫詐傳於衆曰察  
漢汗令復與控噶爾打仗諭我等土爾扈  
特十六歲以上者全數赴敵我先人鄂岳  
竒原因避患投生所以來此今察漢汗與  
控噶爾為敵我等二次隨征人口俱未能  
生還今又令十六歲以上者盡行出兵似

借征控噶爾之名暗行殲滅我等計將安  
出所屬之土爾扈特人等本懼控噶爾之  
強一聞此信家號戶啼昇沸喧嘩烏巴錫  
見人心搖動遂傳集大小宰桑諭以棄此  
而逃往伊犁之意各大喜整備鞍馬鎗矛  
收衆牲畜日營遠行之計而是年天氣溫  
和十月中旬河水未冰河北岸人戶不能  
渡河又恐消息走漏鄂羅斯起兵追殺於



是烏巴錫不及俟河北人戶遂將鄂羅斯  
之匠役千人及貿易人等盡行殺死携其  
所部之土爾扈特霍碩特懷特都爾伯特  
額魯特人等四十六萬餘戶於十月二十  
三日起程而竄沿途劫搶殘破鄂羅斯之  
小城四五處其察漢汗聞風即令濟納拉  
喇帶兵追趕濟納拉喇者彼國之將軍也  
而土爾扈特大衆已逾坑格勒圖喇而南  
坑格勒圖喇者鄂羅斯邊界之卡倫也以  
南即中國地界其濟納拉喇不敢逾界來  
追收兵而去烏巴錫既詐其人衆棄鄂羅  
斯而逃至伊犁部下漸知其詐且棄久居  
之樂土欲占中國之疆界勢恐難行人心  
不一紛紛逃回額濟爾河者不下數萬戶  
烏巴錫亦不能禁止自坑格勒圖喇由哈  
薩克之勒布什邊界四十可抵伊犁之撻



拉巴哈台其間皆空廓無人之野水草豐  
足但與鄂羅斯隣近烏巴錫既恐鄂羅斯  
截殺又慮部下逃回不敢由勒布什行走  
遂奴其部落於巴爾噶什腦免西南而來  
其間經過之郭壁五日雖有水泉寸草不  
生土爾扈特之羊隻及疲瘦牲畜均行倒  
斃過巴爾噶什腦免至青可斯察漢地方  
即哈薩克王阿布賴及阿布免比斯阿布

爾班必管轄之地哈薩克人等既慮擾其  
遊牧又利土爾扈特之人口牲畜什物遂  
群起搶奪朝朝打仗雖土爾扈特人等亦  
遭殺傷不能阻其前進反將哈薩克人口  
擄掠數十為之嚮導至克齊克玉子地方  
其人強梁近布魯特歲相攻殺習於戰陣  
鄂托克五處台吉等管下之人戶殷繁其  
二品頂戴侍衛職銜之哈薩克台額納里



納拉里人明白為衆哈薩克所服聞知土  
爾扈特在青可斯察漢打仗消息遂將伊  
附近大路之人戶牲畜盡行遠徙揀練精  
銳萬餘人馬肥械利迎於克齊克玉子之  
要路屯劄一面移會哈薩克王阿布賴欲  
令阿布賴迎頭截戰渠於尾後追殺而令  
五處鄂托克之台吉人等於中路四出邀  
截使之首尾不能相救可以得志而哈薩

克王阿布賴早將土爾扈特人等棄鄂羅  
斯而來伊犁併青可斯察漢打仗消息日  
行八百里報知伊犁將軍聽候信矣土爾  
扈特大衆既集額納里納拉里見其勢衆  
略難阻攔烏巴錫亦畏額納里納拉里之  
精銳不敢輕動相持十七八日將軍諭列  
令哈薩克台吉等加意保護地方不許土  
爾扈特由遊牧之處穿走搔擾一面飛稟



大兵接應額納里納拉里見諭即遣人告  
知烏巴錫及葉勒水丕免等以爾等既往  
伊犁投奔即係

大皇帝奴僕我等亦係

大皇帝奴僕斷無攔阻爾等之理但我等遊牧  
處牲畜甚多爾等手下人不復侵害爾等  
須由沙喇伯克一路而去則可我等派人  
為爾嚮導烏巴錫與其台吉喇嘛等計議

欲由哈拉他爾行走以其地之牲畜多水  
草盛搶奪而至伊犁再看光景而額納里  
納拉里堅執不從相持又四五日適哈拉  
他爾人戶聞風亦盡行聚集來迎人多兵  
強一俟土爾扈特近其境界即行打仗放  
鎗及伊犁將軍傳諭原委烏巴錫等均已  
知覺計出無奈遂與額勒里納拉里請和  
聽從其言向沙喇伯克而去額勒里納拉



里帶領克齊克玉子哈拉他爾之人出其  
不意從中截斷抄尾追殺肆行擄掠被擒  
殺之士爾扈特人等不可勝計行至沙喇  
伯克南界與布魯特地界相連布魯特人  
等聞知土爾扈特前來各皆大喜以為天  
賜約齊各愛曼人戶十餘萬騎蠶屯雲聚  
以伺之烏巴錫不敢由沙喇伯克南界之  
或我圖腦兒來而避入沙喇伯克北界之  
千里大郭壁矣千餘里內滴水皆無寸草  
亦稀時三月天已溫熱喇嘛下劄答祈雪  
不過一二寸隨下隨消不能濟用人皆取  
牛馬之血而飲瘟疫大作人口死亡二三  
十萬牲畜十存三四經十餘日狼狽而逃  
出郭壁而布魯特人衆久候於郭壁之外  
是時土爾扈特部落已不能軍惟有奔走  
若因而殲之可以滅其種類而布魯特人



數雖多並無行陣人自為戰不務殺人專  
務搶奪或前或後或聚或散晝夜追殺土  
爾扈特之男婦子女牲畜什物為布魯特  
所劫尤甚於哈薩克之所亡失追至他木  
哈地方至大兵安設卡倫之處布魯特人  
等方始歛兵而退伊犁將軍舒赫德叅贊  
大臣伊勒圖帶領屯防之滿漢官兵即他  
木哈地方安設大營四處分布犄角之勢

烏巴錫已至他木哈猶有男婦大小二十  
七八萬人將軍遣侍衛普吉保察哈爾領  
隊大臣納旺散秩大臣額魯特碩通滿洲  
協領拿鑑巴虎佐領呼圖克前往問其來  
意六七日伊等方議定妥以投誠

大皇帝為詞烏巴錫等謁見將軍遂進

貢玉器自鳴鐘時刻表定宣瓷盤自來烏鎗  
拉古爾木碗金錢等件並呈



獻伊祖受之前明永樂八年漢篆玉印一顆  
於是將軍帶領官兵及土爾扈特人衆盡  
行赴伊犁聽候查辦然他木哈至伊犁四  
站時已六月其人疾病飢渴加以炎暑死  
者枕藉於道伊犁河南岸屍骸遍野渡河  
而至北岸則伊犁將軍方准給散口糧河  
大船少擁擠爭渡落水而死及得口糧後  
貪飽而死又不計其數所餘僅四萬數千

餘口耳奉

旨着額駙色布騰巴爾珠爾等帶領土爾扈特  
烏巴錫及其台吉頭目人等赴熱河

行在引

見伊犁將軍遂令其汗烏巴錫<sup>人名</sup>台吉策伯克  
多爾濟<sup>人名</sup>額莫根烏巴希<sup>人名</sup>班巴爾之子  
單伯扎爾桑<sup>人名</sup>莫們圖<sup>人名</sup>羅卜藏扎爾燦  
喇嘛  
新入土爾扈特之額魯特台吉舍楞<sup>人名</sup>



沙拉扣肯人名德爾得錫人名碩特台吉葉  
勒木丕免人名根敦那爾布人名綽羅斯台吉  
三達克之子肯則人名等一十三人赴熱河

行在瞻仰

天顏之後奉

旨封烏巴錫為土爾扈特部落草里克圖汗策  
伯克多爾濟為布彥圖親王舍楞為新入  
土爾扈特之額魯特等部落畢里克圖郡

王班巴爾為畢錫勒爾圖郡王功格為霍  
碩特部落勒圖薩圖貝勒莫們圖為濟爾  
噶爾貝勒旺淡人名沙喇扣肯人名葉勒木丕  
免人名克布騰人名額莫根烏巴希人名俱封貝  
子拜濟呼為輔國公拉海搏爾哈什哈為  
一等台吉以上均為札薩克領食俸薪各  
轄部落各不相統屬其餘大頭目三十人  
均受封一、二、三、四等台吉有差均聽伊犁



將軍管轄受封後俱令反回伊犁各歸部  
落於是安插土爾扈特汗烏巴錫部落於  
札伊爾地方居住去塔爾巴哈台馬行七  
日安插親王策伯克多爾濟部落於霍卜  
克薩里地方居住去塔爾巴哈台馬行四  
日安插郡王舍楞部落於歸化城極北之  
科布多地方居住歸入噶爾噶汗管轄安  
插郡王班巴爾部落於布爾噶齊布拉克

地方居住去烏魯木齊馬行十二日安插  
貝勒功格部落於著勒土斯地方居住去  
伊犁馬行十三日安插貝勒莫們圖部落  
於托里地方居住去伊犁馬行五日以上  
各部落均賞給地土令其游牧耕種以遂  
其生乾隆三十八年因烏巴錫部落所分  
之札依爾地方天氣極寒難以耕種遂移  
住著勒土斯四十一年貝勒莫們圖部落



之在托里地方者亦移於著勒土斯居住  
四十年烏巴錫病故其土爾扈特汗奉  
旨着烏巴錫之子策璘納木札爾承襲時年八  
歲

異域瑣談西陲軍事卷二終



